

दिनांक 08.03.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- राष्ट्रपति द्रौपदी मुर्मू कामकाज मांय महिलावां री भागीदारी बधावण माथे जोर दीनो—अंतर्राष्ट्रीय महिला दिवस रे मौके नई दिल्ली मांय राख्यी ज्या राष्ट्रीय परामर्श ने संबोधित कीना।
- मुख्यमंत्री भजनलाल शर्मा लाडो प्रोत्साहन योजना रा तैत दी जावण वाळी रकम एक लाख ऊं बधा र डोढ़ लाख रुपया करण रो ऐलाण कीनो।
- लोकसभा अध्यक्ष ओम बिरला जयपुर मांय कोन्स्टीट्यूशन क्लब रो उद्घाटन कीनो—कह्यो— ओ क्लब लोकतंत्र ने मजबूती देता थकां बातचीत रो खास मंच बणेला।
- केन्द्र सरकार रो आवता पांच साल मांय मेडिकल कॉलेजां मांय 75 हजार सीटां और बधावण रो विचार।

000

राष्ट्रपति द्रौपदी मुर्मू कामकाज मांय महिलावां री बत्ती भागीदारी माथे जोर दीनो है। वे आज नई दिल्ली मांय अंतर्राष्ट्रीय महिला दिवस रे मौके **नारी शक्ति से विकसित भारत** मुद्दा माथे राख्यी ज्या सम्मेलन रा उद्घाटन जळसा मांय बोल रही ही। ई मौके राष्ट्रपति महिलावां री बरकत रा काम मांय सगळा ऊं मदद री अपील कीनी।

.....

प्रधानमंत्री नरेंद्र मोदी कह्यो है के केन्द्र सरकार महिलावां ने मजबूत बणावण सारू लगातार काम कर रही है। आज अंतर्राष्ट्रीय महिला दिवस रे मौके गुजरात रा नवसारी मांय राख्यी ज्या **‘लखपति दीदी सम्मेलन’** मांय श्री मोदी कह्यो के भारत, **महिलावां री अगुवाई वाळा विकास** री दिशा मांय आगे बढ़ रह्यो है।

.....

सम्मेलन मांय प्रधानमंत्री खुद सेवक समूहां री 25 हजार ऊं बत्ती महिलावां ने साढे चार सौ करोड़ रुपया री माली मदद दीनी। महिला दिवस रे मौके प्रदेश मांय आज केई कार्यक्रम राख्यी ज्या। जयपुर मांय राख्यी ज्या राज्य स्तर रा महिला सम्मान समारोह मांय मुख्यमंत्री भजनलाल शर्मा लाडो प्रोत्साहन योजना रा तहत दी जावण वाळी सेविंग बॉड री रकम एक लाख ऊं बधा र डोढ़ लाख रुपया करण रो ऐलाण कीनो।

.....

महिला दिवस रे मौके जयपुर विकास प्राधिकरण शहर रा सेन्ट्रल पार्क मांय महिलावां सारू टॉयलेट बणावण रो ऐलाण कीनो। कोटा मांय महिलावां री वॉकेथोन राख्यी ज्यी अर महिला स्वास्थ्य जांच शिविर ई लगायी ज्यो। झुंझुनूं मांय महिला सम्मान समारोह अर रंगोली बणावण री होड़ राख्यी

ज्यी। बांसवाड़ा अर बालोतरा मांय कार्यशाला राख्यी ज्यी, जद के भरतपुर मांय वाद-विवाद री होड़ राख्यी ज्यी। सवाईमाधोपुर मांय केन्द्रीय संचार ब्यूरो री ओर ऊं राख्यी ज्यी संगोष्ठी मांय महिलावां ने न्यारा-न्यारा कानूनां री जाणकारी दीरीजी।

000

अंतर्राष्ट्रीय महिला दिवस रे मौके पेश है सिरौही जिला री थावरी देवी री कामयाबी री कहानी, जो सौ ऊं बत्ता घरां ने रोशन कीना। पेश है एक रपट —

.....

000

राज्य कैबिनेट री आज जयपुर मांय मीटिंग व्ही। मुख्यमंत्री भजन लाल शर्मा री सदरत मांय व्ही मीटिंग मांय कोचिंग सेन्टर नियंत्रण बिल रा मसौदा ने मंजूरी देवण , नौकरी-धंधा सारु नौजवानां ने तैयार करण बाबत् राजस्थान कौशल नीति पारित करण ऊं जुड़्या फैसला अर न्यारा-न्यारा महकमां मांय पद नाम मांय बदलाव समेत केई फैसला करी ज्या। समाचार मांड्या जावण ताई उप-मुख्यमंत्री डॉ. प्रेम चंद बैरवा अर संसदीय कार्य मंत्री जोगा राम पटेल मीटिंग मांय करी ज्या फैसलां री जाणकारी खबरनवीसां ने दे रह्या हा।

000

जयपुर मांय आज कोन्स्टीट्यूशन क्लब री सरुआत व्ही। लोकसभा अध्यक्ष ओम बिरला अर मुख्यमंत्री भजनलाल शर्मा इण रो उद्घाटन कीनो। ई मौके लोकसभा अध्यक्ष कह्यो के लोकतंत्र री मजबूती सारु बातचीत जरूरी है। श्री बिरला विधानसभा, नगर निकाय अर पंचायत स्तर री सगळी लोकतांत्रिक संस्थावां मांय चर्चा अर संवाद री रीत बणायी राखण माथे जोर दीनो। लोकसभा स्पीकर कह्यो के कोन्स्टीट्यूशन क्लब बातचीत रो खास मंच बण र लोकतंत्र ने मजबूती देवेला।

.....

ई मौके मुख्यमंत्री भजन लाल शर्मा कह्यो के कोन्स्टीट्यूशन क्लब लोकतंत्र रा मूल सिद्धांतां अर जनप्रतिनिधित्व ने मजबूत बणावण री कोशिश है। उद्घाटन जळसा मांय केन्द्रीय कृषि अर कृषि कल्याण राज्य मंत्री भागीरथ चौधरी, विधानसभा अध्यक्ष वासुदेव देवनानी, केई कैबिनेट मंत्री अर विधायक मौजूद रह्या।

000

केन्द्र सरकार आवता पांच साल मांय मेडिकल कॉलेजां मांय 75 हजार और सीटां बधावण रा बारा मांय विचार कर रही है। केन्द्रीय स्वास्थ्य मंत्री जे.पी. नड्डा आज नई दिल्ली मांय राख्यी ज्यी **अंतर्राष्ट्रीय स्वास्थ्य प्रौद्योगिकी मूल्यांकन संगोष्ठी** रा उद्घाटन सत्र मांय आ जाणकारी दीनी। वे कह्यो के साल 2014 पाछे देश मांय मेडिकल कॉलेजां री तादाद मांय एक सौ एक फीसदी री बधोतरी व्ही है। स्वास्थ्य मंत्री बतायो के ई रे अलावा 22 अखिल भारतीय आयुर्विज्ञान संस्थान सरु करी ज्या है।

000

मुख्यमंत्री भजनलाल शर्मा कह्यो है के आइफा अवॉर्ड समारोह सिनेमा अर संस्कृति रा विस्तार री निशाणी है। वे आज आइफा सिल्वर जुबली अवॉर्ड समारोह रा बारा मांय राख्यी ज्यी प्रेस वार्ता मांय बोल रह्या हा। वे कह्या के ओ आयोजन जयपुर मांय राखण ऊं राज्य मांय कॉन्सर्ट टूरिज्म री सरुआत व्हेला। ई सागे ई ब्याह-शादी री ठौड़ रा तौर ऊं राजस्थान री पिछाण और तेजी ऊं बधेला। श्री शर्मा कह्यो के फिल्म टूरिज्म रा हलका मांय ई प्रदेश री लोकप्रियता तेजी ऊं बधी है। ई मौके उपमुख्यमंत्री अर पर्यटन मंत्री दिया कुमारी कह्यो के आइफा रा आयोजन ऊं प्रदेश मांय सैर-सपाटा ने बधावो मिलेला।

.....

आईफा रजत जयंती समारोह मांय आज डिजिटल अवॉर्ड्स दिया जा रह्या है। इण मांय ओटीटी सितारां रो ई मान कर्यो जावेला।

000

डीग मांय काल बृज होली महोत्सव सरु व्हेला। जिला प्रशासन अर पर्यटन विभाग री ओर ऊं राख्या जावण वाळा दो दिन रा ई उत्सव मांय शोभा यात्रा निकाळी जावेला, न्यारी-न्यारी होड़ां राख्यी जावेला अर सांस्कृतिक कार्यक्रम व्हेला। डीग रा नामी जल महल मांय फव्वारा चला र होळी

रा रंग बिखेरया जावेला। पाली जिला मांय ई मिन्दरां मांय फागोत्सव रो उमाव है अर होळी रा गीत गाया जा रहया है।

000

उदयपुर रा सज्जनगढ़ बायोलॉजिकल पार्क हलका मांय लारला चार दिन ऊं धधक रही लाय आज बुझा दीरीजी। लाय रा बधता कोप ने ध्यान राखता थकां आरे-सारे रा गांवां ने खाली करा दिया ज्या हा। आग ने बुझावण सारू दमकल री 16 गाडियां साढ़े तीन सौ फेरा लगाया अर सवा सौ वनकर्मि अर 65 दमकलकर्मि लगातार कोशिशों कीनी।

000

प्रदेश मांय दिन री बगत पारो चढ़बा ऊं हल्की गर्मी रो एहसास व्हेवण लाग्यो है, हालांकि रात री बगत हाल ई ठण्ड रो असर बण्योड़ो है। बाड़मेर मांय काल पारो 38 डिग्री सेल्सियस ने पार कर ग्यो। घणखर ठोड़ा दिन री बगत तापमान 30 डिग्री सेल्सियस ऊं ऊंचो चाल रह्यो है। कठे-कठे पारो 35 डिग्री सेल्सियस ऊं ई बत्तो व्हे ग्यो है।

रात री बगत घणखर हलकां मांय तापमान 15 डिग्री सेल्सियस ऊं नीचे दर्ज कर्ग्यो जा रह्यो है। बीती रात हनुमानगढ़ जिला रा संगरिया मांय 8 दशमलव 1, फतेहपुर मांय 8 दशमलव 6 अर सीकर मांय न्यूनतम तापमान 8 दशमलव 7 डिग्री सेल्सियस रह्यो। मौसम केन्द्र जयपुर रे मुजब आवता चार-पांच दिन मौसम साफ रेहवण रा आसार है।

000

आई.सी.सी. चैम्पियन्स ट्रॉफी क्रिकेट होड़ रो फाइनल मुकाबलो काल दुबई मांय भारत अर न्यूजीलैंड बीचे खेल्यो जावेला। टूर्नामेंट मांय भारत री टीम हाल ताई सगळा मैच जीत्या है। दूजी कानी न्यूजीलैंड री टीम दबाव रा हालात मांय ई चोखो खेल बतावण रो बूतो राखे है।

000